



**Komunikadu Imprensa**  
**Munisípiu Dili**  
**20 Agostu 2019**

## **JSMP realiza Treinamentu iha Suku Gari-Uai, Postu Administrativu Baucau-Munisípiu Baucau**

JSMP iha 15 Agostu 2019, realiza treinamentu ba membru konsellu suku no comunidade iha suku Gari-Uai, Postu Administrativu Baucau, Munisípiu Baucau kona-ba “Demokrásia no kna’ar órgaun soberanu, partisipasaun públika iha prosesu halo lei no asesu ba justisa formál iha Timor-Leste.

Partisipante sira ne’ebé partisipa iha treinamentu ne’e hamutuk ema na’in 30 kompostu hosi feto nain 6 no mane 24.

“Treinamentu ne’e nu’udar atividade kontinuasaun hosi JSMP nia programa treinamentu ne’ebé durante ne’e halo ona atu hasa’e koñesimentu membru konsellu suku sira nian kona-ba saida mak estadu demokrásia, knaar órgaun soberania estadu sira, prosesu halo lei no asesu ba justisa formal hodi promove partisipasaun comunidade sira iha dezenvolvimentu demokrásia no justisa iha Timor-Leste”, dehan Diretór Interinu JSMP, Casimiro dos Santos.

JSMP mós hanoin katak liu hosi treinamentu refere, hanesan meiu ida atu bele fasilita membru konsellu suku no comunidade sira atu bele hato’o sira-nia hanoin no preokupasaun sira relaciona ho kestaun relevante sira ne’ebé hasoru iha suku laran liu-liu liga ho asuntu ne’ebé mak mensiona iha leten.

Iha sesaun abertura ba treinamentu ne’e, representante hosi Koordinadór Fundu Sisiedade Sivíl Gabinetei Primeiru-Ministru Sr. Albertino Sarmiento haktuir katak informasaun ne’ebé JSMP fahe importante no útil tebes ba konsellu suku sira no comunidade atu hatene tanba ne’e nia espera katak konsellu suku sira no comunidade ne’ebé partisipa bele aprende buat ruma iha treinamentu ne’e hodi bele hatutan mós informasaun refere ba comunidade sira ne’ebé la partisipa iha treinamentu ida ne’e.

Iha sorin seluk lia nain suku Gari-Uai Sr. Sebastião da Silva iha nia intervensaun konsidera materia ba treiname ne’e importante ba konsellu suku sira atu rona no aprende tanba ne’e nia parte hato’o agradese wain ba ekipa JSMP tanba bele iha insiativa diak no bele deside ami nia suku hanesan grupu alvu JSMP nian hodi bela mai fó treinamentu ba konsellu suku sira iha Gari-Uai. Alende ne’e, xefe aldeia continua husu ba JSMP atu treinamentu hanesan, bele realiza mós iha sira nia aldeia hodi nune’e bele involve partisipasaun comunidade sira nian barak liutan.

Durante treinamentu kestaun justisa sai hanesan preokupasaun boot, liu-liu lei ne’ebé mak tama ona iha vigor comunidade sira rasik lahetene no oinsá mak sira bele kumpri enkuantu sira rasik la kompriénde kona-ba lei sira ne’e, nune’e sira konsidera katak falta sosializasaun ba iha lei sira

ne'ebé mak tama ona iha vigor. Aleinde ne'e iha mós preokupasaun seluk kona-ba tratamentu la iguál iha prosesu justisa entre ema boot no ema kiik. Preokupasaun seluk mós kona-ba aplikasaun demokrásia fó liberdade ba ema atu koalia ema seluk sein limite iha Timor-Leste ne'e tuir lei sira ka lae.

Hatán ba ketaun kona-ba sira kona-ba lei sira ne'ebé vigora ona la iha sosializasaun JSMP konsidera ida ne'e hanesan fallansu ida ne'ebé durane ne'e governu no Parlamentu Nasionál infrenta tanba ne'e JSMP husu nafatin ba órgaun rua ne'e atu pro-ativa halo sosializasaun ba lei sira ne'ebé vigor atu nune'e comunidade sira bele kumpriénde.

Entertantu kona-ba lei aplika deit ba ema ki'ik JSMP diskorda ho hanoin ida ne'e no esplika katak lei aplika ba ema hotu hanesan no la halo diskriminasaun ba ema ida tanbatanba nia ki'ik ka kiak no ida ne'e prevee kedas iha artigu 16 konstituisaun hanesan prinsípiu ida ne'ebé estadu tenki aseguira atu promove no próteze.

Relasiona ho aplikasaun demokrásia iha ita nia nasaun tuir lei ka lae, JSMP esplika katak iha sistema demokrásia povu mak nain ba póder no ukun no iha prinsipíu ita nia nasaun nu'udar estadu direitu demokrátiku ho nia baze kaer ba prinsípiu ida katak lei mak ás liu ema hotu tanba ne'e iha sistema demokrásia ne'ebé ita aplika tenki bazeia deit ba lei sira ne'ebé iha ona hanesan regra sira ne'ebé estadu estabelese nu'udar norma ne'ebé obriga ema hotu ne'ebé moris iha teritóriu Timor-Leste tenki kumpri.

Atividade treinamentu ne'e, realiza tanba hetan apoiu finanseiru hosi VIII Governu Konstitusionál liu husi Fundu Sosiedade Sivíl, Gabinete Primeiru Ministru.

Atu hetan informasaun liután favór kontaktu direitamente:

Casimiro dos Santos  
Diretór Ezekutivu Interinu JSMP  
E-mail: [casimiro@jsmp.tl](mailto:casimiro@jsmp.tl)  
Telefone: 77257466 ka 3323883  
Website: <http://jsmp.tl/>